

Rakitnica

Rakitnica je rijeka u centralnom dijelu Bosne i Hercegovine. Izvire na zapadnom kraju Treskavice u blizini naselja Rakitnice, na nadmorskoj visini od između 1300 i 1500 m i ulijeva se u Neretvu na planinskoj tromeđi Bjelašnica-Visočica-Prenj, kao njezina desna pritoka, nedaleko od Boračkog jezera, na nadmorskoj visini od 324 m. Nema jedan izvor za kojeg bi se sa sigurnošću moglo reći da je to glavni izvor rijeke, nego je to niz izvora na navedenom području. Rijeka Rakitnica, sa svojim čuvenim kanjonom, razdvaja planine Bjelašnicu i Visočicu i odvodi druge potoke u Neretvu.

Pritoci Rakitnice, redoslijedom od njezina izvorišta do ušća u Neretvu, su slijedeći:

- > Tušilačka rijeka (ljevi pritok, ušće na 1108 m n.v.), dotiče s Visočice
- > Šklope (desni pritok, potok), s Bjelašnice
- > Studeni potok (desni pritok, potok), s Bjelašnice
- > Peruće (desni pritok, potok, ušće na 742 m n.v.), s Bjelašnice točnije obronaka Oblja
- > Međeđa (ljevi pritok, potok), dotiče s Visočice
- > Grušća ((ljevi pritok, riječica), dotiče s Visočice

Kanjon:

Ova tipična planinska rijeka duboko se usjekla između Bjelašnice sa desne i Visočice s lijeve strane, formirajući kanjon, morfološki fenomen i idilično čudo divlje prirode, s nizom brzaka, slapova, vodopada i mirnih bazena. Kanjon Rakitnice najduži je i najdublji u Bosni i Hercegovini; dug je preko 20 km, a dubina se kreće između 800 i 1000 m. Početak kanjona Rakitnice nalazi se na nadmorskoj visini od 1120 m. Najatraktivniji dio toka ove rijeke se nalazi između mosta na prometnici Lukomir-Bobovica do Lučice (Bajrina koliba). To je tok rijeke od 4-5 km s padom od oko 300 m i brojnim slapovima i vodopadima.

U vrijeme obilnih padalina i topljenja snijega na nekim dijelovima, razina Rakitnice podigne se i za 20 m. U vrijeme proljetnih kiša su naročito atraktivni vodopadi koji se obaraju s visokih stijena na obroncima Bjelašnice i Visočice. Takav je vodopad Studeni Potok, gdje u pojedinim razdobljima u godini voda pada u kanjon s visine od 400 m. Kanjon je moguće proći, ali isključivo uz pomoć stručnih vodiča. U vrijeme nižeg vodostaja moguće je pješačkom stazom proći od mosta kod sela Tušila do ušća u Neretvu (poželjno je koristiti manje gumene čamce). Kad se krene kanjonom Rakitnice, nemoguće je vratiti se; izlazak je moguć jedino kod ušća Rakitnice u Neretvu.

Tzv. "turistička ruta" prati posljednjih 6-7 km kanjona Rakitnice do ušća u Neretvu, koja meandrira oko krajnjih okuka oko vrha Oštro. Izraz "turistički" pruža također izuzetan doživljaj, ali i zahtjevan i ne potpuno bezopasan, jer zahtijeva dobru fizičku spremnost, prilagodljivost niskim temperaturama, kao i okretnost u vodi.

Flora i fauna:

Cjelokupna dužina kanjona Rakitnice je stanište endemskih vrsta flora i faune. Ovdje postoje 32 vrste endemskih biljaka, cvjetova i drveća koje žive u ovoj maloj regiji Dinarskog gorja. Medvjedi, vukovi, divlji veprovi, lisice i divlje koze nalaze svoje sklonište u ovom teško pristupačnom kanjonu. Svojim tokom od 32 km ne protječe kroz naseljena mjesta, a voda je pitka od izvora do ušća. U njoj se nalaze potočna i mekousna pastrmka (endem) i lipljan, i to u velikim količinama. Najpovoljniji dio toka za ribolov je od cestovnog mosta kod sela Tušila do pješačkog mosta na stazi za Bobovicu. Zahvaljujući svojoj jedinstvenoj ljepoti i teškoj pristupačnosti,